

四庫全書

集部

欽定四庫全書

集部

粵西叢載卷八七

欽定四庫全書

集部

粵西叢載卷八七

詳校官庶吉士臣瑚圖禮

主事銜臣徐以坤覆勘

總校官庶吉士

臣朱

鋐

校對官庶吉士臣吳裕德

賈錄監生臣沈瑞錦

欽定四庫全書

粵西叢載卷七

桂林府通判汪森編

高嵩

中峰高先生嵩幼為宜山縣學生員習春秋屢舉不第  
一夕忽夢學門右棟柱有金龍蟠遶鱗介閃爍少頃向  
北飛去先生迤邐隨之怖而覺每旦來學受業必於柱  
下端拱一揖有友楊壽者謂其駛大書于柱以嘲之曰

此柱神乎人乎未幾先生以春秋魁鄉薦數年淹滯校官始轉興府伴讀審理人謂弗驗正德辛巳竟以扈蹕功位至太僕卿而寵遇殊常乃知龍飛之徵真不偶也

慶遠

御製詩

文事紀聞紀世宗御製送毛伯溫南征詩大將征夷膽氣豪腰懸秋水雁翎刀風吹金鼓山河動電閃旌旗日月高天上麒麟原有種穴中螻蟻莫能逃太平頌詔回

轍日親與將軍脫戰袍損齋備忘錄則太祖送總兵楊  
文征蠻詩也雁翎刀曰呂虔刀末云大標銅柱歸來日  
庭院春深慶百勞備忘錄作於弘治中交事紀聞之附  
會不言可知然太祖製集無之又見宋時一小說云是  
哲宗送大將征夷則其來久矣然哲宗事亦不足信蓋  
野人之談三變矣弇州稿

蔣閣老冕

上欲北巡自稱威武大將軍朱壽巡邊命內閣草制冕

曰陛下受天明命內而四海外而四夷孰不尊稱如天  
如日若稱朱壽號為將軍臣鼎鑊在前不敢奉詔公扈  
駕至南京隨事規諫曲盡心力懇請回鑾自春至秋懷  
疏跪門者屢次至于不穿罩甲則雖錢寧江彬同傳旨  
苦逼亦未敢曲從不賀總督府懸挂牌額則雖文武羣  
臣守候行禮亦不肯往李樂見聞雜記

嘉靖三年五月冕罷初建室議起冕言皇上既受命于  
武宗即嗣武宗後以奉宗廟今欲于本生父立廟將置

孝宗武宗於何地乎願賜罷歸上曰朕方倚任共圖洪  
理建室禮儀朕自裁定之既而復以請寢席書璁萼召  
命不報遂移疾乞去從之御史王泮等疏留不報典彙

西樵野記言吾郡中蔣閣老冕歷仕三朝而始告歸田  
里朝廷慕其賢使使三聘之不至睿制詩一闋頌云聞  
說江南一老牛徵書聘下已三秋主人有甚相虧汝幾  
度加鞭不轉頭冕稽首俯伏以對詩云老牛用力已多  
年領破皮穿只愛眠犁耙已休春雨足主人何用苦加

鞭終不就若此忠義具見之矣按蔣閣老冕全州人嘉靖三年以議禮不合而乞致仕豈有三聘之說且此二

詩三家村社人所不語而筆之於書抑何俚鄙無識也

弇洲  
稿

馬錄

御史馬錄按張寅獄得罪謫戍廣西賓州南丹衛閉戶少接人事在謫所生一子入賓州學補廩後錄死于此子扶櫬歸葬錄既得罪久人有問張寅是否李福達錄

曰彼時匆匆只據人說是李福達然亦未知果是否也是蓋自悔之深亦以避禍云耳然余每遇山西人詢之無知愚皆以為真李福達不以大獄為公也但謂郭勛黨反者為有異謀則失之蓋張寅善黃白術以重賄介崔駢馬元結勛勛素貪受之縱其出入門下同時常給事亦謫廣西常遊邕管指揮羅明縛之人驚問故羅曰彼有旨但逃出境外殺之則縛之未為過也當道惡之尋以他事亦坐謫戍奏辯得白而卒

月山叢談

張經

大藤峽在潯州北東通五屯永安修仁荔浦北通武象西通來賓遷江柳慶諸賊誠淵藪要害之地也天順成化間數反兩廣騷動乃命都御史韓公雍帥數將軍征之深入九層樓更其名為斷藤峽然捷報未幾旋復閉塞以後復數反陳公金亦嘗征之復更峽名最後半洲張公經承潘公失事之後留意此賊征後使翁東崖築弩灘城以控扼之賊遂不復反凡柳慶舟楫往來如蹈

無人之境至今二十年如一日乃知委任得人處置得宜半洲公為優韓公徒有其名耳韓公輕財能斷其長自不可掩吳人記事文過其實謂韓曾吸斷藤賊之腦適足以點污之耳初無是事也

月山叢談

林寬

嘉靖七年陞金華知府張錢為廣西參政管田州府事吏部尚書桂萼言王守仁區畫田寧土目先試以巡檢知州先試以吏目知府先試以同知試三年而後實授

其薦林寬為同知益試知府也朝廷既假之便宜宜遂從其議上以為然命寬以同知掌府事俟三年有成即陞知府鉞仍舊職典彙

江一桂

江一桂字白石新安人守太平時交夷莫登庸蠢動世宗命毛伯溫征之伯溫計先遣使往諭公請行登庸乃稱臣公築受降城建昭德臺於鎮南關以奠巨防上嘉公績進階亞中大夫及卒諸夷刲枕榔祠于關內祀焉

嚴從簡殊  
域周咨錄

陶鳳儀

嘉靖二十四年詔廣東守臣為故浙江副使陶成及其子湖  
廣左布政魯立祠于會城歲時致祭從錦衣指揮陶鳳  
儀請也成原籍鬱林州正統時為僉事以討處州叛賊  
功陞副使既而為賊所獲死之景泰遣官諭祭贈參政  
民為立祠成化間詔蘭谿湯谿二縣官春秋致祭魯以  
父蔭起家與征兩廣洞蠻積功至布政使諸蠻深讎之

乃發掘其祖墳戮其宗黨魯卒子孫不敢回鬱林遂占  
籍南海孝宗復廢魯子世襲千戶鳳儀成曾孫也

典彙

秦檉

永定長官韋啓邦係韋繼祖之子世為永定土司酋長  
父子猛悍便捷過人嘉靖辛亥春慶遠府知府閔旦上  
任未幾公堂忽失硃盒筆架直堂人役畏罪辨賠越二  
日連桌幃硃池一概失去稟官查點閔寬大愛民亦不  
深究又越數夜有強賊三百餘明火露刃從府後架梯

越城而入劈死巡卒直入府堂殺民款二人守庫三人  
兩夾道殺四人用鐵杵沖破庫門劫官銀數千兩從西  
城出人莫之敢擾也次早遣官軍四下緝訪莫知端倪  
越月餘陸續拏獲賊徒供稱啓邦先遣細作盜硃盒桌  
幃以驗隄防緊緩衆口一詞閔旦佯為不然曰彼土官  
世享富貴焉有此事日久愈訪愈的而閔翦除之策定  
矣次年以京考離郡事遂寢閔去啓邦父子益無忌憚  
自後本省暨鄰省劫庫紛起獲賊鞫訊咸開啓邦父子

姓名閔後繼以劉一中曾雲歐陽必述節奉上司密帖  
擒之奈其依山為險機會未投後知府秦檉沉毅有謀  
謁見軍門即以此事托之檉蒞任不動聲色先檄各土  
司俱要親謁本府待以禮貌如有抗拒請兵勦滅啓邦  
父死羽翼已衰見永順土司鄧秀副長官彭大武出謁  
俱蒙殊眷又以歲久事息況秦新任焉能遽察遂挺身  
出秦見大喜曰爾來何遲聞爾武藝超羣馬上能飛鎗  
掣劍果有之乎啓邦唯唯願試次日秦詣教塲啓邦盡

試之秦益喜重賞令侍燕寵以兕觥流輩側目且示之  
曰吾兒挾此藝能何患不富貴吾力薦爾拜將封侯皆  
男子分內事也啓邦喜出望外自後無間形骸啓邦到  
府徑入直出了無嫌疑秦欲捉小寇即與偕往呼即來  
揮即去一日傳一密票喚啓邦至慶遠候本府親行分  
都亮地啓邦亦如期而至公先伏虎士於兩廂啓邦入  
或言少待或言直入何害諸阜正推阻間虎士湧出綁  
縛當時斧折兩臂斬之其隨帶四五十人尚炊未熟公

下令皆斬無一逃脫萬民稱快秦恐地方生變即遣牌安插准伊妻莫氏代理四境帖然後有單萬貴者亦大盜也先被獲發監竟越獄逃去聚衆謀亂檉亦以計斬

之慶遠

陳文明全城蹟略

陳丞公名文明潯之桂平人以明經太學除松溪丞時嘉靖壬戌倭分道入閩有三千人自溫州登陸所經福安壽寧政和三縣不二決旬俱攻破遂以十二月初一

日抵松溪勢張甚意可蹂而入耳令王公懼欲棄城去  
公謂松城頗完固今場圃初畢城中有餘蓄勢自可守  
何忍棄之乃集邑中諸豪計事咸願死守且戰遂分布  
乘陴而公自分北面蓋城三面臨溪澗惟北面距山可  
乘也分既定乃以間出兵數與賊戰殺傷兩相當倭長  
用鳥銃伺間擊城中人而城中人亦用強弩毒矢射倭  
持數日令君議與倭和括民間金三千兩帛二百疋以  
謀往說倭倭佯許曰須張宴宴我縣官盡出陪坐先以

名刺來投謀還報公怒謂吾堂堂天朝命吏豈與賊奴  
會宴者與典史區公俱不肯署名遂止以令名往初十  
日張宴城東洲上隔岸設坐募男子有威儀膽略者偽  
為令騎從導出陪之謀將庖人往治庖用竹簾來還白  
事賊笑不食先是賊攻政和政和丞督兵與戰戰敗父  
子皆被執是日賊取丞父子出反接洲上遙語曰是政  
和丞也曾以兵拒我者遂剗其肝生食之意在公也既  
而進金帛不受酬以倭刀一公曰是欲屠吾城藉令不

幸如政和丞為賊所鬻食亦分也誓必死時時激厲邑  
衆皆感憤出涕會募遂應坑兵及溪源鄉兵各數百俱  
集賊覘有備佯緩兵為欲去狀而陰治攻具作雲卓雲  
梯成以二十二日未明詐以別梯緣南城而擁雲車自  
北進城上爭投下石及竹木之類拒令車不得傅城賊  
於車上作轉輪飛梯未至數丈輒掀梯城上揮刀登陴  
閃爍炫目衆畏懼稍退公執刀前曰退者先戮之適張  
德者奮巨斧斫一賊下一賊繼上又斫之衆謹呼而前

賊氣沮遂下礮石折其梯收民間竹燈篝數千燃之揮出車上竹受油漬久火熾不能卒滅遂灰其車二十六日專用連梯齊附城而上遙以鳥銃擊城上人先日奮勇者皆遇害公豫令煮糞汁以待使人杓而潑之賊皆潰爛墜自相壓礮石亂下擊死者甚衆遂不得上二十八夜用大發噴擊賊營賊倉皇驚竄遯走久之始定於是力屈有去意會募浙之栗陽兵三百人至其兵進退有法紀律閒整正月初二日戰於西嶺殺賊數十人賊

忿以為自海洋登陸未嘗受衄若此初五日中夜拔營  
遜去仍由政和故道趨海上城獲以全是役也城圍三  
十五日建中無隻矢來援非公奮不顧身誓衆鼓厲諸  
豪無所統一勢必不能堅持松既失守建以西延以南  
人性緩弱輕脆驚之易動時蒲陽之變猖獗甚人無固  
志南北聲勢相應閩事倍難收矣公功不獨在松在閩  
也當事既不急松又無援師故畧其事公以明經遷一  
小邑令長是故應爾所謂戰勝而履腐者非邪初力策

戰守予從兄涇伯兄源皆從公親履行陣從子杭戰死  
家丁遇害者數人先奉政公嘗數謂濬曰非陳丞公覆  
巢之下寧有完卵今安得女曹偷餘魂相保以有今日  
也孺予其無忘之萬曆己酉予得命西中間道過里取  
邑志考之及閱禦倭錄俱止載廣西人父老亦莫能名  
其何許人知其陞縣令以去亦莫能名其何縣比歲校  
既周所得諸郡志多未備而尋柳皆未見志以間蹤迹  
之亡所得此念未了會遣僅歸里命兒曹細訪之冀有

知者久之所聞如故僅還報有日矣友人金善夫賈達  
事人也亦嘗極意尋訪所居前有古井過者暑渴則就  
飲坐磐石少憇乃去以為常一日善夫方解衣盤薄疎  
離之內見一老者就井飲飲畢坐石上笑語同坐者曰  
有一異事吾少時常事舊丞陳公今老矣昨偶夢公來  
此善夫亟披衣出問之曰汝云何老者起曰予夢所事  
舊丞陳公異之故爾善夫曰舊丞為誰老者曰陳公名  
文明吾為葉金也少時為公門役事已五十餘年吾亦

七十往矣昨夢見之間公何為來此公曰命我來管兵耳善夫語之故老者曰公潯州桂平縣人居在郡城中夫人馬氏郡鉅姓有一子尚少吾嘗送眷至其家焉公後為瓊州府感恩縣知縣善夫喜甚遂作書報予邑中一時闕傳以為異謂公功德在松食饗祀于此神靈猶依依不去實陰佑吾松人也予近校士至柳王司訓敦化桂平人因以其事詢之業不知其邑先輩有此人矣久之來報云公號靜軒在感恩時以子幼拂衣歸歸

數年卒子繼亦夭歿今無嗣餘俱與所述同耳

西事

### 王貽德

嘉興知府王貽德廣西人在官秋毫無取亦不以地方財結交上官時各邑有三大貪令皆公所壁斷劣處其

趙清獻之後身乎

李樂見  
聞雜記

### 陳仲倫

羊城陳侯仲倫為全州佐課農於郊因進父老詢及民瘼對曰田禾告稔獨虎為患陳喟然曰昔孔子過泰山

聞累傷于虎而哭者問何以不去答曰無苛政今民苦于虎而不去此未知吾政何如而虎患不除則出作入息如民何即日下令曰六鄉之民有能捕虎一者賞銀五兩民喜賞爭設機檻計捕之彌月生致虎十有二悉殲之患遂除當時民歌之曰山有於菟使君搏之野有禾黍庶民獲之出入無虞民用樂之

全州志

嚴遵試

嚴遵試賀縣人萬曆間宰英德英毅敏幹讞決兩造稱

平贖錢悉令雜藥草根以代服毒輕死之風遂息

廣東通志

### 劉元相

劉元相全州人由舉人為高州府同知萬曆四年羅旁始平督臣議建封門函口南鄉富霖四所防盜當路重元相才令專董其事元相經營有法不踰月而版築悉具時叅將楊照守函口病卒士卒死于瘴疫者半代楊照者黃允中憚行議遷其地當路許可元相力爭曰函口西接巨峒南界高涼實猺獞出入之險無函口是無

西山也人臣為國守封疆允中不往請以身居之議遂  
寢迄今西山諸境晏然無事皆元相之功後竟以勞瘁

卒

廣東通志

戚秉忠

萬曆初橫嶺賊藍龍返與其子本偉本堂本惠焚劫各  
村警報日至七年慶遠府揭報巡撫張公任任督指揮  
戚秉忠謀除之時秉忠署河池哨軍門督責甚嚴秉忠  
知龍返有僕被撻甚怨龍返令軍伴徐振紀厚交其僕

與銀二十兩結為兄弟始知龍返據火把峒賊中虛實  
皆知之一日龍返遣藍金謀伏路劫奪僕報知秉忠率  
兵斬之又密報藍本偉在墟貿易秉忠又追斬之龍返  
怒期會衆殺秉忠僕報知秉忠令僕探龍返睡濃將弩  
弦割斷去其利刃秉忠領二十餘人潛伏峒口伺間竊  
入龍返始驚醒被秉忠一鎗穿其腹中須臾衆兵湧入  
餘黨勦滅而橫嶺諸賊遂皆蕩平慶遠府志

趙成安

萬曆七年慶遠衛軍忽會集演武場張旗歛血口稱激  
變人情洶洶知府趙成安聞報略不動念報愈緊急趙  
曰此豈軍自為之中必有主使之者乃出白牌一面仰  
經歷陳坦就齋前去徑逐出境牌內更無招回字樣陳  
經歷至大漕各軍見牌股栗不勝稽首於陳經歷之前  
曰此本管官害我也本府遲支軍糧三月我等皆知地  
方多事本管官令我等張旗而反我死無日矣陳又問  
歛血猪酒自何處來曰此軍人杜朝清祭社猪也杜言

神猪誓不發而本管威逼扛赴教場釀成此禍望救各

軍性命陳始押令面縛見府趙從容訊曰爾等好漢誰

使你去誰使你來諸軍膽喪前後真情吐露殆盡趙將

首禍數人各責四十具文欲申而主謀之人惶懼求解

其事遂寢

慶遠  
府志

### 舒太史三生聞見

載籍所著輪廻事迹甚衆但取奇異駭聽不無附會如楊大年之為武夷控鶴仙人蘇子瞻之為西湖壽星寺

老僧皆其自語然固事之必有者舒太史弘志再生其事相傳不一壬子春有名弘慈者來應里選名在錄中余召而詢之則果太史後身也太史以乙未卒于濟上時司馬公治河駐南旺未及視舍次年丙申那地州極邊有屬東蘭土目分轄彼中者厥妻孕將就蓐前一夕夢有貴官乘車黃繖羣從甚衆導至其家云借住數日當即去質明舉一子右臂有青紋似墨跡甚明云尚書舒應龍之子其人故蠱穢不識字抱兒就土舍辨之舍

云此漢字也聞省中有貴宦是此名姓者遂以報州長  
州長頗知太史已化亟馳報司馬公公令人往視事果  
實因聞于當事令人抱兒至其家見字迹宛然遂擇保  
母乳之命以今名初司馬公候代真州代者乃楊公後  
山公令人齎符勅往是夕楊公夫人夢有少年宦客盛  
容服入揖之云老父之事惟老伯能明之楊夫人惘然  
莫知所謂因云衙衛森嚴汝何從入答曰吾隨勅印來  
爾次晨夫人以告楊公楊公甚異之遂作書以報司馬

予詢其尚能記往事否答曰不知也聞其三歲時值太史忌日司馬公及夫人奠畢感傷哭甚慟忽從傍應云不必哭兒在此又聞全湘古有讖云菩薩去狀元來會湘山妙明塔災寂照禪師遺蛻俱付鬻攸未幾太史登第皆傳為妙明再出雖其名第少有中眉之恨然聞其生而寡言笑少嗜欲無俗情及仕宦態信非上德具有宿根者不能及此也則太史來去了然蓋三世矣此予得于聞見之真者故備志之耳

西事

全州舒編修弘志十九中丙戌探花其年授官卒卒時  
其省軍人家生子腹上有三肉字紅色微高於膚乃探  
花名姓守某公聞驗視果然即遣急足報其尊人尚書  
應龍中陽公正憂失子嗣絕即往購得抱歸屬探花  
婦鞠之以為孫自是肉字漸消滅然探花當十九猶不  
茹草不省人道蓋亦從釋迦中來纔成婚宦便已觀化  
其為榮名何異電光而以肉字故復自為子尚滯愛根

邪

劉獻  
談  
林

養利二知州子

知州羅爵之子洪先于弘治十年生在養利任所十八年公再復任在養利從學後中嘉靖八年狀元知州葉朝榮於萬曆十一年任子向高隨任從學養利後中鼎甲官至宰相

州志

劉侍御

劉侍御臺疏論江陵五十言言甚痛切江陵憾之逮詔獄罷歸復嗾江西按撫誣其仇家誣奏以他事論戍潯

州侍御抵戍所不久暴卒卒正與江陵同日常見宋史載洪忠宣忤秦檜安置英州後徙袁州至南雍州卒是日檜亦死此兩事正同

西事  
珥

甘汝遷

甘汝遷富川人萬曆十九年以選貢知三水縣儉朴慈愛嘗單騎行縣講讀六歲躬親解說延見父老教育子弟人親之若父母歲旱為文禱神三日不雨自繫以禱須臾滂沱四徧圜土貳疫必躬禱之胥江盜麥孔陽等

晝為漁人夜則羣繫檣梶操之若飛往來劫掠殺人沉  
之深潭人無知者汝遷庶得其情親往詰之召善沒者  
撈骨為證會潭深輒不可得乃焚香告天朱書沒者之  
臂曰取骨伸冤遂躍入盡撈而出盜始伏辜每詣郡他  
邑獄難決者上官悉以委訊有業箕者傭于人家箕斷  
自刺其脇而死誣人殺之數年不決汝遷一讞即白其  
誣合郡歎服其為政精誠明敏多類此

廣東通志

伍世奇

伍世竒全州人由舉人萬曆三十七年知龍門縣先是邑苦稅繁前官議欲派入民糧以便徵收世竒下車即集父老商之曰稅雖不便有時而蠲一入實徵恐成定額後不可減竟不編入民永賴之

廣東通志

龔一清

壬辰余起粵西滇粵乃陳公應虹甚器少參龔一清嘗謂二司粵西獨右江為盤錯非龔少參我輩豈能安枕又言龔少參操守即夷齊不過其才即韓范無加也龔

擢滇中憲副特疏保留未幾應虹擢制府去通州陳公  
如固至首對余言龔少參穢惡幾激邊釁而直指行部  
至柳州民投瓦礫入使署數千繫褚于上皆訟言龔惡  
未幾龔以疾卒語云千人所指無病而死不知當時陳  
應虹何以知賞獨深馮時可 滇行 紀聞下同

馮時可

余往在粵西住清軍道時尚書應城陳公應虹為中丞  
余署桂林兵巡道查出永寧等處土司占沒田土三百

頃入官作餉又縛叛兵數十人正法署藩司印追出庫  
吏盜金六百兩盡除庫吏夙弊又臨桂令貪虐甚中丞  
命余親盤其庫得其乾沒狀及中丞擢兩廣制府余俸  
僅七月中丞特入薦疏其語云天韻崇竑風猷遠鏡  
別能洗空萬馬刃遊則立解千牛又揭吏部曰馮憲副  
乃天下才也當冠諸藩臬

臧懋中

臧懋中字用甫長興人萬曆戊戌進士授金谿令累官

歷粵西僉臬署八桂兵事以屯堡代驛逋軍不濫役而  
民力稍蘇比入覲卒于京

長興縣志

汪繼英

汪繼英字志在休寧人由歲貢任薊州同知署州篆  
勵清操革火耗民便之適潯貴割馬賊震鄰英躬自禦  
賊地方賴以安州有水口形家言宜建高閣以砥下流  
築長隄以迴龍脉英捐俸倡助泣任四載惟存舊篋不

受一縑卒於官

休寧縣志下同

俞時育

俞時育號對蒼休寧人薦于鄉授霍丘諭陞江西定南  
令遷廣西隆安令固圉周防多底厥績兩邑祠之

程策

程策字獻可休寧人萬曆庚戌進士任西安司理轉南  
儀部時魏璫竊權拜其祠者如駕策獨不往出守德安  
尋督學廣西具藻鑑後三科榜首皆其首拔士陞鄖襄  
參政卒於官

李應裕

李應裕字履順婺源人領鄉薦擢平樂府撫序同知粵故多猺獞所撫乃熟夷設治在深山菁峒中山嵐為毒流官多不久駐每歲居其境數月猺性狃直與居民小不合輒格鬪至是歛輯盡吐露冤抑裕誠吏民母為虐立社學稍知字附為俊秀猺始有欣欣然向化者嘗三稅賀橋一意寬恤商為設生祠後因執持與司道不合

毅然乞休

婺源縣志

謝肇淪

謝肇淪晉安人宦於粵西輯百粵風土記其序云桂林象郡秦漢始隸職方其地多危巒怒江虎蹲電激其人多山猺水蠻被卉食生往往阻聲教而尋干戈故雖列王會而掌故闕焉唐莫休符宋范至能洎近代田叔禾張羽王諸君子間有紀述多餽釘而寡全鼎無亦以彈丸荒服非軒輶所恒經文人墨士即欲探砂勾漏問石鼈林而至者歎矣余提刑粵西受事之日淺而師命十

七病十三懼竊升斗而無述也取風土之耳且目者次第筆焉眎郡邑諸乘繁簡徑庭矣而間出乘之所未載語有之北人見賚不知為布是百粵賚也藏之宛委以俟後之觀風或有采云天啓壬戌九月下浣識

朱弘

朱弘臨桂人由鄉舉除吳川令崇禎七年陞知崖州仁恕愛民八年大祲弘緩催科賦不及額郡二千石及臺使者數加誚讓弘附奏記略曰降黜是甘不忍念愚民

剜肉竭髓也九年考滿當遷以簡傲忤中貴報罷

廣東通志

### 烈婦

正統間參軍范信兵既入大同里

在潯州府平南縣

俘獲甚衆

旗牌官人給賊婦一二人值昏暮拘繫一室中夜半哄然視之乃三四人就經也此猶或憚威懼死而然又有  
一烈者年尚少負一小兒過嶺忽不行曰吾欲乳兒從之婦乘間投嶺下死嗚呼忠義之性出于天何地無之亦無人無之婦可謂不負于賊矣夫婦不幸而夫賊猶

不忍負賊使婦而配一男子丈夫其所裨益又當何如  
邪吾於是而知事人而二其心者之有罪也

水東日記

三烈祠

三烈祠者銅仁劉時舉之姊辰秀及庶母張氏郭氏時  
舉父仁赴梧州別駕行至大墟病卒泊舟昭平堡時猺  
賊公感聚衆橫行江上劫殺得辰秀辰秀以緹囊投噉  
賊脫身赴水死張繼之郭又繼之賊怒盡殺其婢僕拽  
時舉以去時舉時年十三事在正德辛巳初金谿張賓

祿與別駕有夙期及至知別駕已故家口遇害之狀泣  
曰死者長已一孤尚在何以脫之乃以金錢遣謀往贖  
時舉公感釋時舉從山後間道出當事義之給傳俾載  
櫜車與其孤還銅仁有司以其事聞久之得旨旌之棹  
楔令昭州祠三烈以勸時舉後舉孝廉再遷為平樂同  
知正其遇難之處衆咸咤為異云

西事珥

姑姪雙烈

萬曆辛亥春陳民部原道歿于京邸其配計氏痛哭觸

棺不死遂不食逾二日卒少司徒孫公具其事上聞上  
令棹楔旌之先是有計貞烈者即計氏之姑也適王憲  
副化憲副先令平遠以貞烈寄會昌會田坑賊起副憲  
與賊戰于黃沙大勝之賊懼遣間至會昌謂王平遠亡  
矣貞烈聞而信之即沐浴更衣以六歲子納妾懷中伏  
劖死事聞上亦賜棹楔且令春秋祠祀兩節俱竒而出  
于姑姪則尤異也西事耳

莫年妹

攝府江時有莫年妹一事甚奇年妹父廩生汝賢母歐  
氏有兄二人其庶母翟氏戊戌寇亂翟有娠汝賢令長  
子隨母次子隨翟氏而自負年妹避寇途遇賊汝賢被  
殺賊執年妹以去教之獐語不能遂逃田主李某家李  
酬以酒飯賊謂李曰此平西莫秀才女也勿令出李藏  
年妹于家時方六歲令與其女俱女長適翟生以年妹  
媵焉居二年年妹漸長翟生欲收為妾李氏怒不肯日  
與翟生閑生偶他出李氏罵年妹曰老婢亟去吾非與

汝共丈夫者年妹遂走出猶記賊平西莫秀才之語因沿途問平西路避人藏迹三日不得食至一村落饑餓力疲甚坐人家門首其人出叱曰汝何家婢子來此年妹泣語之故其人曰莫秀才妻嫁此處人家因馳往報之歐氏至不能認其容貌歐氏名指無甲妹及二兄指亦如之以此為記又妹生時磕損其額角瘢痕宛然母子相持哭既而長兄亦至因詢次兄則翟氏娘已生子名翟養貞守不嫁且撫養其次子已為婚娶矣予聞為

獎異翟氏今年妹仍依翟氏居為擇良家子嫁之此事  
離合絕奇然歐遽變節而翟不二其志且撫次子與其  
子至于成立戴媯之事不為異矣詩不云乎采葑采菲  
無以下體其好醜之迹志之俱足以風云

崎南  
瑣記

秦氏

秦氏永福人嫁某數月死後嫁張名已而名風疾名故  
貧卒氏忍饑凍營粥餌以事之備嘗荼苦積十年生二  
子俱幼萬歷庚戌鄰舍火起氏急抱二子出置空地上

復入欲負其夫時火勢已及衆止之氏不聽冒燄而入

遂與夫俱死火中火息撥灰覓之則夫骸燬盡而氏體

獨全予聞行縣優恤其家第再醮礙於格令置豐碑二

上書云義烈秦氏一堅于墓一堅道左俾觀者有所感

云崎南  
瑣記

粵西叢載卷七

欽定四庫全書

粵西叢載卷八

桂林府通判汪森編

總督兩廣軍務

有詳文載中名宦傳者不備錄須參看又王世貞總督攷亦在文載中

王翹

景泰三年命太子太保左都御史王翹總督兩廣軍務時南蠻寇兩廣副總兵董興武毅觀望不肯戰巡撫侍郎揭稽李棠不相統賊益熾于謙請用安遠侯柳溥總

督兩廣軍務如溥未可出臣諫及戶部尚書金濂左都御史王翹乞用一人上命翹往蠻尋平

國朝典彙下同

按兩廣地勢接連休戚相關故景泰元年廣東黃蕭養之變廣西曾動調官軍一萬之上前來策應及景泰三年廣西有韋萬秀之變總兵武毅節奏協濟而廣東副總兵董興不調兵應援彼此猜忌事多牽制及寇賊擾攘而鎮將官互相觀望不即勦捕朝廷更置其將簡翹總兩廣軍務自總兵以下悉聽節制凡事得便宜而行

於是事權歸一而提督之任遂為東南總鎮矣

馬昂

馬昂字景高滄州人景泰甲戌以右都御史代王翹總督兩廣時夷寇猖獗昂懲土酋之跋扈屬民者將校不職輒劾罷之兩廣以寧廣東通志

葉盛

天順二年召守制山西參政葉盛擢僉都御史巡撫兩廣盛乞終制不允時廣西流賊多入廣東為害而兩鎮

將官不協各分彼此討賊迄無成功盛至請革兩廣守  
將立總鎮于梧州居中調度則賊可平矣衆是其策而  
不果行盛不得已乃請益兵上命都督顏虎率兵赴之  
盛與虎協謀破賊砦八百所擒斬數萬人而還

國朝  
典彙

韓雍

成化元年因猺酋侯大狗自景泰以來作亂嘯聚至萬  
人墮城殺吏而修仁荔浦平樂力山諸猺應之其勢益  
張天順中詔能捕大狗者予千金爵一級卒莫得久之

鬱林博白新會信宜興安馬平來賓亦煽亂所至丘墟  
兩廣三司皆戴罪守官至是兵部尚書王竑奏言峽賊  
稱亂久矣其始皆由守臣以招撫為功譬之驕子愈惜  
愈啼非流血撻之不止也浙江參政韓雍文武全才若  
以討賊之計屬之可逭南顧于是陞雍左僉都御史與  
趙輔等討之督餉則戶部右侍郎薛遠紀功則監察御  
史劉慶汪霖也是年六月雍等會南京或曰方今兩廣  
殘破盜賊蜂起譬之烈火燎原無復緩急宜分兵一由

庾嶺入廣東一由湖廣入廣西隨在撲之俟其團結乃可圖爾雍曰不然兵法有云萃於中堅先其難之謂也大藤峽為廣西腹心之患舍此不圖而分兵四出賊必擁而漫流流賊愈多而州縣愈破謬所謂救火而噓之也莫若併力西向擣其心腹元惡既擒餘必投刃而解矣諸將曰然乃以官軍三萬人兼程而進七月至全州會陽峒西延苗賊為梗出偏師擊滅之戮失機指揮李英等四人軍威大振九月至桂林議曰修仁荔浦峽賊

之羽翼也不剪則心腹之患難除乃以永順保靖及兩江土兵一十六萬人五路並進先破修仁窮追至力山生擒一千二百餘人斬首七三百餘級十月至潯州延父老問計皆曰大藤峽天險密箐重嵒三時癟瘴某等生長一方莫得要領今兵威久振賊備益堅莫若屯兵四圍且耕且守以待其斃雍曰不然峽山遼闊岐路分披輪囷六百里間安可圖也且屯兵日久彼銳我衰睥睨之奸患起衝突法曰先人有奪人之心乘勝之謂

也今我軍新破府江勇氣百倍峽賊聞之亦已褫魄不  
若因而乘之可立破也乃以六萬八千人為右軍總兵  
歐信參將孫麒高端都指揮夏正葛宗廕指揮王英等  
將之自象州武宣分為五道攻其北以九萬二十人為  
左軍以都指揮白全楊瑛張剛王紀彭倫夏鑑柴正指  
揮唐雄等將之由桂平平南分為八道攻其南以左叅  
將孫震指揮程文昌千戶李慶等巡守左江及結五屯  
截其奔路雍興輔和開府高振嶺以督諸軍令信曰山

北既破便可提兵深入夾攻桂林橫石諸崖令正曰林  
峒沙田府江間道也宜越古眉雙髻諸山伏兵林峒扼  
其東奔諸將受命乃十二月之朔諸軍並發腹背夾攻  
連破石門道袍屋廈柴荆竹踏良腦古營牛腸大岵等  
寨賊皆遁入桂州橫石寺塘九層樓據險立柵以抗雍  
麾死士以大斧刊木開道兩軍齊登發火箭焚其營柵  
而正又自林峒來援賊大驚潰生擒侯大狗等七百八  
十餘人斬首三十二百餘級望風皆散先是峽中有大

藤如斗延亘兩崖諸蠻蟻渡故曰大藤峽至是斬之改名斷藤峽遂以明年正月班師于是奏設巡檢司千戶所詔如雍議雷禮

平蠻碑云公奉命以討有罪一以仁義誠信宅心師至之始即律之曰夫兵凶器也聖人不得已而用之苟非以順而動不可也若等勿盡劉無幸勿濫容首惡勿過彼之來降勿爽我之號令斯事濟矣衆咸曰諾于是發偏師先征荔浦修仁西延陽峒然後移兵斷藤橫石等

八百餘寨所過之地如振槁如破竹自成化乙酉冬十一月至丙戌春正月凡五征不克者一舉而平之

又云取勝之師必在于速戰乃遣官軍面授方略水陸並進是歲七月一戰而克遂以七軍之在行者分為五路八月進全州興安凡若干戰賊大敗九月又往廣西五路發兵進討荔浦修仁十一月師至大藤峽又釐為二十五哨固守衝要四面夾攻賊預偪險阻牢不可破以滾石檑木長鎗毒矢抗敵公忿然曰吾受天子重託

生靈命脈在此一舉事若少緩則民兵膽喪鉅萬之衆  
肝腦塗地又曰文王之師攻必緩戰必徐者欲俟其革  
心順服而全之也公復下令且招且撫致附者一萬三  
千其怙終者則天誅不可留乃申嚴號令以身先之肆  
兵前進萬衆驩呼聲搖山嶽一戰而渠魁就縛羣兇失  
怙鬼竄狐奔旬月之間攻破寨峒五百乃州治其地設  
巡司六擇其夷心信者數人授以土官而約束撫安之  
施以實惠量給以田使之耕各遂其生

畜德錄云都御史韓雍征大藤峽出兵令五鼓戰將領者聞賊已覺恐遲失事二更即發大破之公賞其功而問以違令之罪以軍法當斬乃具聞請釋曰萬一不用命而敗奈何人謂公得將之體以上俱雷禮

韓中丞兵入大藤忽青袍方巾數十人出林中執香拜伏軍前問之曰我等悉良民向執公役為賊掠至官軍累征未嘗深入無緣殄滅今公至此我等必得脫寃獲矣韓厲聲曰爾等皆賊敢欺我邪悉裸而斬之果皆短

兵裹於衣乃盡支解之隨兵入路散懸身首於樹夾道

不絕峽中首聞驚呼天神至矣極力拒敵不支遂平之

祝允明

下同

韓公膽勇絕人初得賊斬之即取其首傾腦飲之却命  
將校飲之多不能也又兩司官方集議兵適引數賊入  
公握刀付一布政曰公可手斬此賊布政戰縮公笑曰  
公談兵何美殺一繫囚猶爾臨陣當如何即自持刀連  
斷數人頭衆懼有眩者其他類此甚多故軍中與賊皆

畏之如虎比聞其死祠之為神

韓公雍總督兩廣軍中獲一善星象者懼其妖言惑衆  
命斬之及斬公試問之曰斬汝者誰歟星士曰紺衣人  
公特命斬者更白衣斬之以破其言公謂術斯妄矣後  
問諸斬者乃裴姓也公愕然又斬一人首仆地其人兩  
手捧其首疾趨數步而蹶侯甸西  
樵野記

成化四年四月雍請廣東廣西各設巡撫從之五年十  
一月設總府于梧州府總制兩廣地方時雍以憂去兩

廣賊勢復張僉事陶魯言兩廣地勢猶一人之身今軍政分而為二以是賊人寇掠無任其責者乞勅大臣總督如馬昂葉盛韓雍故事庶事體歸一巡按御史龔晟亦言宜立總府於梧州簡命大臣兼制兩廣則事統于一而責有歸兵部亦言兩廣互為唇齒廣東藉廣西之兵力廣西藉廣東之糧儲今巡撫等官名位頗頗議論之際甲可乙否宜如魯等所請上召兵部會官議舉起復韓雍為右都御史總督兩廣軍務兼理巡撫

國朝典彙

成化十年二月鎮守廣西少監黃沁計奏總督韓雍坐  
視猺賊出沒隱匿不報以致斷藤峽賊復嘯聚滋蔓流  
劫郡縣上免雍罪命致仕雍在兩廣威令素行沁不得  
恣其欲布政何宜迂而固副使張敷貪而暴不為雍所  
禮乃與沁攻計之及差官往覈適委宜敷行勘竟成其  
罪同上

韓公永熙作鎮兩廣時峒蠻方熾公深追之斬大藤峽  
嶺表悉安梧州兩廣中界也公於此開都府聽治焉門

列畫鼓數十面每有出入則過之以為節凡給侍左右皆三品指使盡極一時之富貴其尊嚴擬於王公也公度量宏大每賓客過必有厚贈軍前取資無算而士氣惜伏無敢有不盡力者諸蠻因是遂屏息不出至於今猶公之功也然公得謗亦竟坐用侈一事解政及後代者至則拘拘繩墨無復公之洞達也當公之時廣中兩司自正使而下交代皆一至梧州參謁候於門下若小吏然及見則長跪白事惴惴不敢以方面自居也及公

歸後凡易四五人皆不得然矣惟交代一見為不廢也  
則如公之威望豈可以時輩小節求之乎

楊循吉  
蘇談

兩廣二司初謁總督行跪禮蓋襄毅之威劫使之其後  
迄不能正嘉靖末應侍郎樞為總督此公守常州導憲

綱不肯跪御史有山字太守之目雖見憎白簡為天下

所誦稱至是人有以風公者不得已聽之跪禮遂廢

王世

貞觚不  
觚錄

先朝之制惟總兵官列營始舉炮奏鼓吹而吾蘇韓襄

毅公雍以右都御史總督兩廣開府梧州最盛自是三  
邊宣大之總督以至内地帶提督者皆然同上

朱英

成化十二年三月命副都御史朱英總督兩廣兼巡撫  
兩廣用兵以來戎帥喜邀功每有小寇輒張大賊勢覬  
用兵得成其私英深知其弊下令撫綏猺獞各安生業  
約束將士寇來在守不許輒進兵諸峒氓有猖亂者購

首惡誅之而釋其黨

國朝典彙

成化十四年十二月兵部尚書余子俊言兩廣夷民雜處叛服不常往緣鎮守巡撫等官頗不一故設立總督之稱使上下協和易於控制比因朱英與總兵官平鄉伯陳政爭坐遂革去總督之稱竊見英自受任以來悉心所事招撫安靜大有成功今忽解去總督之柄恐諸夷輕視反側復生且太監顧恒總兵官陳政亦皆有功俱請裁處上曰國家懸爵賞以待有功誠所不吝但不可以冒濫朱英顧恒陳政既有招撫勞效邊徼靖安

英陞右都御史仍總督兩廣軍務恒政各賜金幣降勅

獎勵

同上

宋旻

成化二十年以大理卿宋旻為右都御史總督兩廣軍務  
旻淳安人為人厚重接物詳慎謙抑在棘寺年久以  
仁恕稱及在兩廣承韓雍平定後號稱無事旻亦以靜

謚鎮定之

國朝典彙

屠浦

弘治元年正月命右都御史屠滽總督兩廣滽以親老乞終養不允留廣東一年斬獲猺獞數百賜綵段銀兩柳州諸戎軍舊番調風土殊習比歲死亡過半乃為區處分守多所全活

國朝典彙

秦紘

弘治四年正月安遠侯柳景鎮守兩廣貪暴不法總督都御史秦紘具列其狀劾之逮景下刑部獄抵法追贓鉅萬緡其爵景求援于壽寧侯內降減其贓且摭他事

誣絃以圖報復由是絃亦被逮坐免既而景贓銀追及  
八百兩詔免其餘刑部尚書彭韶爭之不聽國朝典彙

唐珣

弘治八年以唐珣為右都御史巡撫兩廣時南蠻弗靖  
珣督兵進剿破村寨嵒洞百餘斬獲萬計捷聞賜勅獎  
勞未幾卒珣華亭人國朝典彙

鄧廷瓊

弘治九年以右都御史鄧廷瓊總督兩廣兩廣自成化

初韓雍平寇後開府梧州率以憲臣有才望及官高者  
總督軍務兼巡撫廷瓊性不瑣瑣思安靜為治屬吏有  
賢者輒薦舉或不職特去一二太甚者東西羣蠻作亂  
者以次討平凡所設施動中機宜

國朝  
典彙

劉大夏

弘治十三年五月起養病戶部侍郎劉大夏為右都御  
史總督兩廣兩廣人士聞其來如嬰兒之望慈母以節  
愛為心汰冗員省煩費伸軍威平寇盜召為兵部尚書

廣東通志

劉東山公

時晚雍州之謫雖事出逆瑾其實公同年

焦閣老芳者為之公與焦素無他特忌公名爾岑猛賂

既行瑾集大臣議欲寘公重辟諸大臣惴惴不敢吐一

語獨都御史屠公瀆曰劉大夏此何罪必欲文致之當

共不應瑾勃怒罵屠惡語汝黨劉邪明日大臣以屠議

奏瑾謀於焦及吏部尚書劉宇宇又素嫉公者乃署劉

某輕議夷人遷徙與潘尚書蕃俱發遠戍瑾初擬廣西

邊衛焦曰是送二人歸也乃定肅州

何孟春餘  
冬序錄

蕭翀

弘治十四年以右都御史蕭翀總督兩廣招撫古田永福諸盜誅左州土酋韋廣隆索其黨悉寘諸法

列卿紀

熊繡

熊繡字汝明寧遠人正德元年以右都御史總制兩廣操勵廉潔嚴番舶抽稅之禁密保甲偵探之法絕中官饋送之例杜州縣署印之奸風裁振肅

廣東通志

陳金

正德二年八月以副都御史陳金總督兩廣時馬平僮  
賊猖獗親統十三萬衆直抵賊巢平之省諭古田賊首  
歸侵疆輸賦如他州縣又斷藤峽賊積久為梗金諭服  
之俾通江路無遏往來上其事賜名永通峽四年春陞  
南京戶部尚書十年十月又以右都御史加太子太保

總督兩廣軍務

國朝典彙

楊旦

正德十三年以右都御史楊旦總督兩廣十五年二月  
巡按廣西御史曹珪誣劾旦時本兵及當國者受岑猛  
賂圖復原職岑璋圖冒趙宗奪龍州旦皆執不可而且  
又曾無餽遺於本兵當國者故嗾珪劾之吏部為之駁  
白誣竟不行尋以母憂去國朝典彙

姚鎮

正嘉間田州土官岑猛恃其兵力陵轢諸峒總督盛應  
期請征之未報應期去嘉靖四年以右都御史姚鎮總

督兩廣軍務鎮征猛猛為歸順知州岑璋鳩死其子邦彥敗死未幾土目盧蘇糾恩土目王受等挾猛子武靖知州邦相反兩江震動御史石金誣劾鎮罔上寡謀上怒罷鎮去

王守仁

嘉靖六年五月總制兩廣姚鏜罷召起王守仁以兵部尚書總制兩廣及江西湖廣軍務守仁疏辭乞留鎮任并薦胡世寧李世勣得旨兩廣多事方藉卿撫定紓朕

南顧之懷鎬已致政卿宜亟往節制諸調度軍馬勦賊安民其母再諉以負朕望仍遣官馳傳趣之

國朝典彙

邕父老為余談新建伯王公守仁平思田時集兩廣江西湖廣四省兵駐南寧公已定議招撫遣人說盧蘇王受投降凡數四往諭方聽命復生疑沮公不得已許帶甲來見既薄城下復要郡倅為質且請軍門牙卒咸易田州人公又不得已悉許之首遂擁衆入甲馬幾填市巷首更與其衆約即事不測各放炮反首既入見公命

發門外杖之百行杖者皆田人微示數而已衆聞杖首  
慄不省何謂遽鼓噪放炮炮三熟不發聲會聞齒杖亡  
恙衆遂定方鼓噪時公坐廳事佯為不聞惟命牙兵速  
畢杖此雖公之雅量鎮物亦豈非天幸哉

董傳策駱越  
漫筆下同

韓中丞斷藤峽功偉矣思田事至煩姚王兩鉅公猶未  
殲其遺孽然姚之主勦王之主撫各有攸宜難以優劣  
論也方岑猛悍鷙日久即不大創艾國紀弛矣猛死實  
姚功蘇受直奴儕耳姚方設計平之御史石金與姚有

隙遂論奏張大其事坐姚罪朝廷至集四省兵專起重  
臣經略豈不謂猝難圖哉然王一議撫二酋遂束手聽  
命顧猶遲疑反覆自相掣肘其非跋扈材章章明也王  
竟不乘兵威磔二酋豈慮當時兵連禍結民不堪命姑  
以計散其黨將復就事誅之歟抑策勲既久重于保成  
業歟人或憤黠奴之稽誅且咎王之委曲遷就然王督  
贛時其擒賊帥咸以計誅人懷疑懼亡怪其鎮重就功  
及乎臨沒猶念田州功未竟王豪英也非其時未可曷

主撫哉按韓征藤峽事出便宜專決而姚王功未就緒  
廷臣猶沮忌之姚既罷去王亦以時宰不相能爵隨沒  
削祖宗朝謀國奉公之臣厥惟艱矣

王新建既降盧蘇改田州為田寧府設置流官又薦林  
左轄富可巡撫張都閫佑可總兵林號省吾王講學門  
人也論議一與王同及王沒林代提督遂思反王議以  
婿時宰因言田州不必改流宜降州治以岑邦相為判  
官邦相者盧蘇所挾以反者也於是盧蘇益驕橫竟弑

邦相遠陶潘蔡三提督不能誅諸土官大憤提督威令  
不行自林始今田州思王不殺降尤德林有再造恩建  
祠並祀以林居左王假有靈羞與林伍享夷食矣林在  
鎮贖貨巨萬而張佑以副總兵鎮田州亦緣要厚貲為  
邦相毒死方王議招盧蘇時所愛信指揮王佐門客岑  
邦高揣知王無殺蘇意私索蘇萬金蘇由此恚恨自沮  
王竟委曲就事不無稍損威重夫先正權略似王公者  
絕少乃其明猶失之素所親厚小人誠難測哉

姚東泉守代時尚議徵兵平思田自贖因檄三司官計事時分巡張僉事邦信素不為姚所重欲陰沮其策乃給郵吏發檄東西交竄之既而三司官以檄誤復請則緩不及徵兵矣國家任法馭吏文移鉤絡牽肘即未易亂亦難靖亂舉事一不相諧雖幸成功且猶撓敗況欲密機指使出敵人不意哉

王新建督四省兵駐南寧因創敷文書院日聚幕僚諸生講學更不議兵事三司官莫測其意謂公假此縱敵

將密有指授也或乘間進言曰招降誠善策脫有不濟  
當云何公歛容謝曰嶺徼苦兵久矣吾實招之非誘致  
也公少年縱橫翕張至是亦厭功名思休輯厥學真有  
進哉一日講良知萬物一體有問木石無知體同安在  
時湖廣兩宣慰侍列所部兵頗驕恣公因答問者曰譬  
如無故壞一木碎一石此心惻然顧惜便見良知同體  
及乎私欲錮蔽雖折人房舍掘人家墓猶恬然不知痛  
癢此是失其本心兩宣慰聞之聳然

王文成公平田州勒石于田復手書于邕管書院之壁  
舊以紙格覆之予初行部至邕謁公廟貌未知之也既  
而間有問及者及再往始得其實是歲邕州大雨雹城  
中屋瓦皆盡聞書院尚未葺治校畢趣往謁令啟格觀  
之見其端勁古峭絕不作華媚態而溫潤含蓄之意自  
溢於柱掠波磔之表使人肅然起敬不敢仰視不知當  
日親炙光儀又當作何狀也然祠象乃肖先生之容而  
成者予得再瞻禮焉典型具在不可謂不幸矣聞公書

時掘地使深以運筆勢其用心如此今字畫頗為雨漏  
所斃間已有不辨者予語宣化令孫君宜作一善計令  
護持可久聞蘇子瞻報恩寺僧堂壁書僧厚衣以紙故  
于厲禁之後得以獨全予往過東林寺見先生壁間作  
寺僧甚珍護之客至輒就指點此雖有紙格之蔽顧終  
歲不啟與篋中之蠹何別然蘇壁宣和間弁歸內院卒  
遭兵燹此壁近百年與先生儀範煥然如在則先生之  
威靈自為呵護無勞神物也

西事珥

下同

王文成平思田事後多遺議翁仁夫云公將薨時對某言田州事非我本心後世誰諒我者然按公謝恩一疏極言兵不必用二豎不足誅土司不可去是其畫雖已先定故入境即遣人招之按公以十月至梧次年七月方抵邕從容十餘月蓋以緩其疑也至則日聚幕僚諸生講學人謂公假此縱敵意必密有指授公謝曰嶺徼苦兵久矣吾實招之非誘致也時蘇受業已俯首聽命為小人索賂遂憤恚疑沮公不得不曲意徇所請二首

終受纓縻至用其犄角之力以平藤峽八寨此一著不  
幾稱完局哉公去而繼之者控馭不盡如策盧蘇驕縱  
弑主稱兵釁寔實張佑開之制府成之政以賄行動皆戲  
局遂任其縱橫攫箬束手而不敢問則所謂不鞭其後  
者也第于時三廣江右之師久集兵勢張甚以公之威  
略乘之宜其取二酋若狐兔從後事遯之謂當日之失  
誅耳譬言之盜伺于垣其兄感以恩信招而入之因得其  
死力圖報捍逐他盜兄死而弟處之失宜盜復為亂不

能禁制遂追而怨其兄曰是胡不于當時亟殺之可無  
今日之患又如武侯既薨南人復反亦將曰是胡不于  
七擒時誅之也故蘇盧之猖狂再逞于文成之歿與孟  
獲之不反僅止于武侯之身是皆不鞭其後者也

張七澤憲副言有邊城者餘姚人有神力而貌么瘠厄  
悴若不勝衣者王文成公討思田八寨時携之俱西使  
入諸峒中窺動靜形勢扮一丐者往猥辱檻樓峒人不  
知也其悉知諸夷出沒及山川阨塞道路險隘多出其

力已叙功文成欲官之城不願文成亦謂其福薄聽之  
犒之亦無多取文成歿不知所終

吉水龍光嘗官縣丞其子履祥從文成公游光遂亦執  
贊焉其人故豪士而機謀迅發九轉不窮貌古鼻多髯  
頗類文成擒濠時出奇實多田州之役公復檄光以從  
蘇受方懷疑陰持兩端公遣光光以數騎往至則坐胡  
牀引二酋跪前宣諭朝廷德意興軍門寬厚不殺之意  
辭懇聲厲意態閒暇二酋故物色文成狀貌驚疑謂即

公自潛行皆莫測所為遂俯首不敢異議

南安禪室一僧坐化傍有偈云五十七年王守仁啓吾  
鑰拂吾塵問君欲識前程事開門即是閉門人王伯安  
平思田八寨後啓此愕然數日卒赤雅

林富陶諧

嘉靖十一年二月兩廣總督林富再上疏求去是時廣  
寇未靖上疑富規避下巡按叢狀吏部言富既候勘必  
俟至遣代恐悞機宜請如成文葉相例預遣官代之乃

以提督南贛都御史陶諧為兵部侍郎總督兩廣

國朝典彙

潘旦

嘉靖十五年以兵部侍郎潘旦總督兩廣旦婺源人愷  
悌寬厚喜怒不形居官持大體而操履方正

國朝典彙

潘鑑

嘉靖二十三年二月以兵部尚書潘鑑總督兩廣九月  
卒贈太子少保謚襄毅鑑婺源人儀觀修挺性夷易不  
為危言激論而耿介壁立不可干以私治官如家恭謹

潔白之操始終一致焉

國朝典彙

張岳

嘉靖二十四年以副都御史張岳提督兩廣先是岳曾任廉州知府溪峒險要將吏賢否較然胸中政尚莊肅平封川柳賀猶進右都御史

廣東通志

予母舅胥臺袁公弱冠掇魏科讀中秘書途遇永嘉不肯避騎出為兵曹郎會部中火永嘉以夙憾逮舅詔獄論死永嘉去改戍尋起用稍遷粵西學憲先是韓襄毅

公開府兩廣藩臬見胥庭參遂沿為故事舅至先令典  
謁者稟白非長揖不可時蔡半洲為政怒弗許舅竟不  
見而去世但知舅氏以文章名而孰知氣節嶙峋乃爾  
故特著之

伍袁萃  
漫錄

蔡半洲名經  
張岳前任

### 周延

周延字南喬吉水人嘉靖二十九年以兵部侍郎提督  
兩廣節冗費杜倖功二廣乂安

廣東  
通志

### 應欖

嘉靖三十年以兵部侍郎應槚總督兩廣軍務粵兩司舊見制府行廷謁禮公以為非禮立更之時桂平諸獮恣為剽寇公密委兵備茅坤討賊出其神謀盡搗其穴殲滅之陽朔志

吳桂芳

嘉靖四十二年九月令總督閩廣都御史張臬致仕陞總理河道副都御史吳桂芳為兵部右侍郎提督兩廣軍務兼理巡撫時和平賊李文彪作亂臬以其地險難

用兵倡議撫之給事中陳懋親劾其縱寇殃民部議亦以臬非軍旅才乃薦桂芳代之且言閩廣道里隔遠不便兼轄請罷總督止以提督兼巡撫上從之因有是命

國朝

典彙

嘉靖四十五年初兩廣各置巡撫成化五年以事體不一寇盜益擾更設總督大臣而罷巡撫及韓雍督撫開府梧州居中節制正德十一年以體統太重改為提督已而惠潮二府山寇時發梧州在二千里外文檄往來

徵調為難乃以總督撫廣東而更設巡撫于廣西支大

綸永

陵編  
年史

劉燾

隆慶元年以兵部左侍郎劉燾總督兩廣軍務時海寇  
曾一本倡亂廣閩廷推燾總督給事中鄭大經疏言項  
皇上以兩廣用兵特簡劉燾為總督顧令所患不在無  
燾而在任燾之未至耳臣謹條上六事曰重事權久信  
任寬文法聽委用廣招徠厚賞格此皆所以委任將帥

而責成功也吏部覆謂兩廣經略事宜悉如大經言而廣福接壤為唇齒之地宜令燾兼督福建軍務庶事權

歸一易于成功得旨允行

國朝典彙

殷正茂

隆慶三年十一月以江西按察使殷正茂為僉都御史巡撫廣西先是廣西以總督兼巡撫後以廣東未寧而廣西古田之變尋起勢不能專制于是議者皆言宜設專官督理軍餉兵部以為請詔吏部舉堪任者以正茂

為之

國朝典

彙下同

廣西舊有巡撫沿革不常隆慶元年改總督兩廣兼巡撫廣西地方四年又改總督兩廣兼理糧餉巡撫廣東於廣西另設巡撫萬曆九年仍改總督帶管鹽法

李遷

隆慶四年五月裁革廣東巡撫改兩廣總督為提督兼廣東巡撫先是給事中光懋言兩廣總督建置已開府蒼梧坐鎮東西兩省今更設二撫臣不惟多官多費適

滋紛擾而於人情馳騖事勢牽挽尤為多端宜革撫臣復提督便御史蘇士潤亦言二粵勢如輔車總督居中控制不惟聲援聯絡且事體歸一章並下吏部覆可故有是命

國朝典彙

郭應聘

萬曆十一年以右都御史郭應聘總制兩廣會安南侵下雷歸順土酋界應聘諭以利害乃上表請罪悉還所侵界作旌廉杜餽功令頒誠所部諸將吏凜凜母敢操

一幣詣制府者

廣東通志

兩廣軍門受司道將領餽遺其來已久至殷石汀陳文  
峰而濫觴極矣歲可得萬金迨郭華溪為政始嚴行禁  
革若僅存者惟初見贊儀離任別儀生辰令節賀儀然  
每舉不過費五六金而又多不受予任粵中空手而見  
空手而別生辰令節惟致空啓而已同列或尤之而戴  
制府不以屑意待予加厚未幾并僅存者亦革之蓋廓  
然一清云

伍袁萃漫錄

吳文華

吳文華萬曆十二年由廣西巡撫總督兩廣為治持大體務與民休息嘗作殘墨二戒以訓官屬幕府肅然討平府江懷賀盜人服其威廣東通志

吳善

吳善字元夫龍溪人萬曆十六年以廣西巡撫晉兵部侍郎總督兩廣下車首禁屠牛賑恤荒歉清虛糧補曠餉庶逋賦核僧田凡苛條悉從報罷而責成吏治尤蒸

蒸切也故事兵餉歲美數千隨幕府出入不問銖毫悉登官籍其廉靖如此卒於署士民思其功德請合祀於

吳桂芳祠

廣東通志

蕭彥

蕭彥涇縣人萬曆十九年以左副都御史總督兩廣軍務性廉潔自奉儉約目擊民艱奏請蠲賦而獻梧稅六十以資國計殫慮邊防籌畫周悉卒於官

廣東通志

戴燿

通志 燿於萬曆二十六年以兵部侍郎任總督

令人指戴制府燿以為汚濫言者實過余與同事未嘗見其苞苴暮夜獨其性寬而無制幕下借為神叢即一遊擊田與其帳下書史相結刺所當用舍即往挾詐又有潘篆史輩為內蠹皆歲得鉅萬咸以為制府自潤而制府實不知也獨其好庇鄉人為郡邑吏者即為民貌虎亦曲相引薦粵人以此甚不服然非有真貪如廣西撫臺楊芳楊芳之貪即司道將領郡邑兵民夷酋無所不取其穢迹罄竹難盡特善結納故中朝士常為所愚

耳嘗欲謀兩廣制府使人宣謗戴公于朝戴未離粵而

楊已先逝何益哉

馮時可滇行紀聞

張鏡心

張鏡心字湛虛河南磁州人崇禎十年總督兩廣平諸

蠻寇功鐫兩粵碑有平蠻紀事八卷

廣東通志

粵西叢載卷八

欽定四庫全書

集部

粵西叢載卷

九至  
十一

詳校官庶吉士臣瑚圖禮

主事銜臣徐以坤覆勘

總校官庶吉士臣朱辟

校對官庶吉士臣吳裕德

賛錄監生臣沈瑞錦

欽定四庫全書

粵西叢載卷九

桂林府通判汪森編

金州二相

廣西之全州僻州也蔣文定冕以成化丁未登第官至少傅太子太傅戶部尚書謹身殿大學士六十二致仕卒贈少師呂文簡調陽以嘉靖庚戌登第官亦至少傅太子太傅吏部尚書建極殿大學士建極即謹身六十

三致仕卒贈太保二公為時相首輔名位權力亦同而

文定之自樹立多矣

弇山堂別集竒事述

兩主會試

呂公調陽隆慶辛未以吏侍學士甲戌以官保大學士

弇山堂別集竒事述

文臣封爵

按大明律文臣不許封公侯嘉靖初修定策功內閣大學士楊廷和蔣冕毛紀封伯爵子孫世襲固辭而許廷

和子孫世襲在京四品文職冕等五品俱不就

弇山堂別集異

述典

車駕東宮迎送功臣

洪武二年征南將軍廖永忠副將軍朱亮祖等師自廣  
西還上遣皇太子率百官迎勞于龍灣既陞見皇太子  
送還第

同上

廣西元魁少年人及未娶

全州蔣解元冕

年十五未娶見張弘道科名盛事錄

以下俱

全州舒探花弘志年十九未娶

儒士高科

全州舒探花弘志

萬曆乙酉丙戌聯科

兄弟尚書

全州蔣昇成化丁未進士大司徒

弟冕同丁未進士大司徒

兄弟卿貳

金州陳瑤成化壬辰進士工部侍郎

珩弘治庚戌進士副都御史

一縣連兩科解元

景泰庚午廣西韋嵩癸酉吳淵俱宜

山人

成化辛卯廣西李澄甲午劉澤俱臨

桂人

弘治辛酉廣西傅文翰甲子喻漢俱藤

縣人

正德丁卯廣西陳俊庚午屠楷俱臨

桂人

嘉靖辛酉廣西馬千乘甲子鄧全策俱全

州人

隆慶丁卯廣西洪敷文庚午洪敷詰俱臨

桂人

萬曆丙子廣西金輝漢己卯王應泰俱馬

平人

一縣解元之盛臨桂十六人

劉淵 洪武

庚午 賀敬

永樂 戊子

趙霖

永樂 癸卯

宋顥

宣德 乙卯

王瓛

景泰 丙子

李

澄 成化

辛卯 劉澤

成化 甲午

劉鑾

成化 癸卯

劉天麒

弘治 己酉

徐淮

弘治 壬子

舒

華 弘治

丁卯 陳俊

正德 丁卯

楊英

嘉靖 壬午

宋廷表

嘉靖 丙午

洪敷文

隆慶 丁卯

洪敷 譚

隆慶 庚午

親兄弟同科進士

成化丙戌科劉本劉策

桂林人

以下俱見管一  
德文獻世家考

成化丁未科蔣冕蔣昇

全州人

同胞四科第

臨桂張孫振孫絕孫繼孫念

俱會魁  
言子

閣臣世家

蔣冕廣西全州人年十五中成化癸卯解元丁未進士少傳太子太傅戶部尚書謹身殿大學士謚文定兄昇同科進士南京戶部尚書族人曙經魁弘治丙辰進士戶部侍郎塗正德辛未進士彬正德甲戌進士參政貢嘉靖甲辰進士僉事焞嘉靖癸丑進士監察御史應期亦癸丑進士遵歲隆慶戊辰進士南京光祿寺卿之秀

萬曆壬辰進士大理寺評事時行嘉靖丁酉解元而舉人復百人遵歲子士忠萬曆癸丑進士河南按察使呂調陽廣西臨桂人嘉靖庚戌榜眼少傅兼太子太傅禮部尚書建極殿大學士謚文簡子興周萬曆丁丑進士應天府府丞次興齊舉人戶部司務父璋知縣興周子嗣簡萬曆丁酉亞魁嗣哲天啓丁卯舉人

臨桂張氏

張策正德丙子舉人武平知縣

張簡策弟舉人知縣

張節策弟嘉靖辛卯舉人

張言策子嘉靖丁未會魁尋甸知縣

張襄簡子舉人知縣

張齊簡子舉人知縣

張高簡子舉人辰州府知府

張孫振言子隆慶辛未進士戶部主事

張孫繩言子隆慶戊辰進士應天府尹

張孫繼言子萬厯癸酉經魁寧國府同知

張孫懋齊子萬厯乙酉舉人衡陽知縣

張孫念言子萬厯己卯亞元

張孫羨高子萬厯丁酉舉人合江知縣

張茂柏振子萬厯甲午亞元平度知縣

張茂梓振子萬厯庚子舉人

張茂梧繩子天啓辛酉解元壬戌進士

張宗燝繩孫天啓辛酉亞魁

韓昌應繩孫原出張宗燦出嗣姑母改令名天啓丁卯

舉人

臨桂張氏

張騰霄嘉靖壬午舉人學正

張東熙知州

張廷熙同知

張嘉熙知縣

張文熙騰霄子經魁萬曆丁丑進士庶吉士太僕少卿

張五玉文熙子萬曆庚子經魁

張五輅文熙子萬曆癸卯經魁

張五衡文熙子萬曆丙午舉人

全州陳氏

陳朴永樂甲午舉人

陳章朴子景泰庚午舉人

陳潮景泰癸酉舉人

陳瑤章子成化壬辰進士通政

陳琬朴孫經魁成化戊戌進士工部侍郎

陳璲朴孫成化癸卯舉人思南知縣

陳璐成化丙午舉人

陳琦成化丙午舉人

陳珩潮子弘治庚戌進士

陳邦傳璲子弘治戊午舉人

陳邦儒弘治戊午舉人

陳邦俸正德辛酉舉人

陳邦偁燧子正德甲戌進士禮部主事

陳邦修朴曾孫經魁嘉靖乙未進士

全州蔣氏

蔣貫洪武癸酉舉人

蔣艮貫孫正統丁卯舉人

蔣冕良子年十五中成化癸卯解元丁未進士仕至少

傳太子太傅戶部尚書謹身殿大學士諡文定

蔣冕昇冕兄同科進士仕至戶部尚書

蔣曄弘治丙辰進士任戶部侍郎

蔣渝正德辛未進士

蔣彬正德甲戌進士任參政

蔣時行嘉靖丁酉解元

蔣賁嘉靖甲辰進士任僉事

蔣淳嘉靖癸丑進士任監察御史

蔣應期嘉靖癸丑進士

蔣遵箴隆慶戊辰進士仕至南京光祿寺卿

蔣之秀萬曆壬辰進士任大理寺評事

蔣蒙吉 蔣輝 蔣棲 蔣增 蔣自亮

蔣時梧

蔣時村

蔣時樞

蔣時諧

蔣全可

蔣承熙

蔣在廷

蔣瑩然

蔣仲善

蔣淑

蔣守廸

蔣守浩

蔣守倫

蔣守戩

蔣守洵

蔣以述

蔣本盛

蔣弘吉

蔣守藩

蔣洪道

蔣士賓

蔣士衡

蔣士觀

蔣士綸

蔣士忠

蔣士謹

蔣希禹

蔣希孟

蔣士龍

蔣正元

蔣奇才 蔣爾才 蔣在達 蔣鑒偃 蔣鑒偁

蔣允方 蔣允卞 蔣允雍 蔣允京 蔣允彥

蔣允臺 蔣貴 蔣繼昌 蔣繼孟 蔣繼閔

蔣承臯 蔣誥 蔣秉崑 蔣時馨 蔣家相

蔣秉珪 蔣季炯 蔣參極 已上俱舉人餘未詳

全州蔣氏一門五  
世祥第

蔣時成化癸卯舉人知縣

蔣曙時弟弘治癸丑進士工部侍郎

蔣訥時子正德庚午舉人推官

蔣識時子正德己卯舉人知縣

蔣誨曙子嘉靖壬子舉人

蔣論曙子嘉靖辛酉舉人

蔣自然曙孫嘉靖壬子舉人

蔣自觀識子嘉靖戊午舉人知縣

蔣自亮識子隆慶丁卯舉人

蔣瑩然曙孫萬曆癸酉舉人知縣

蔣在庭時曾孫萬曆癸酉舉人

蔣在達自觀子萬曆甲午舉人

蔣鑒可時玄孫萬曆戊子舉人

全州伍氏

伍睿隆慶辛未進士任戶部主事

伍伯椿 伍成大 伍表世 伍昌祐 伍匡世

伍就湯 伍常振 伍成璋 伍奇世 伍啓元

伍成弼 伍倫睦 伍元正 伍道秉 伍則化

伍心臣 己上十六人俱舉人餘未詳

全州舒氏

舒綱弘治辛酉舉人海陽教諭

舒文奎綱子嘉靖乙酉舉人知縣

舒文璧綱姪嘉靖甲午舉人

舒應龍文奎孫嘉靖壬戌進士太子少保兵部尚書

舒應麟應龍弟隆慶庚午舉人

舒應鳳應龍弟萬曆己卯舉人

舒弘志應龍子亞魁萬曆丙戌探花編修

舒弘德天啓丁卯舉人

平南張氏

張惠知縣

張輝惠子宣德丙午解元

張廷綸輝子經魁天順庚辰進士戶部主事

張潔廷綸子成化戊戌進士兵部尚書

張激潔弟成化庚子舉人

張廷組廷綸弟弘治壬子舉人

張楷弘治辛酉舉人

馬平王氏

王尚學嘉靖戊戌進士兵部郎中

王化尚學子嘉靖壬子舉人廣東副使

王啓元化子天啓壬戌進士庶吉士檢討

馬平徐氏

徐亨成化乙酉舉人

徐鍾淮亨子弘治戊午舉人同知

徐養正鍾淮子嘉靖辛丑進士兵部尚書

徐一鶚舉人

徐秋鶴養正子隆慶戊辰進士

馬平莫氏

莫汝能弘治壬子舉人岑溪知縣

莫大德汝能子嘉靖壬午舉人知縣

莫抑大德子嘉靖癸丑進士副使

莫與齊抑子隆慶辛未進士參政

柳州衛余氏

余幹成化甲午舉人

余崇鳳幹子弘治壬子舉人合州知州

余勉學崇鳳子嘉靖癸未進士按察使

子方貢生

余立勉學子解元嘉靖壬戌進士兵部侍郎

余亶推官

余玄通判



粵西叢載卷九